

Inini ataatsimoorfusartuni atortunik innallagiatortunik ikkussorneqarsimasunik nakkutilliineq pillugu Namminersorlutik Oqartussat nalunaarutaat

§ 6, imm 1 aamma § 20 imm. 2 naapertorlugu Sanaartukkat innaallagissamut atugassat, innaallagissamut ikkussuinerit aamma atortut innaallagiatortut pillugit Inatsisartut Peqqussutaat nr. 12, 3. november 1994-imeersumi, Inatsisartut Inatsisaanni nr. 19, 12. juni 2019-imeersumi allanngortinneqartumi, Innaallagissiornermut Oqartussanit aalajangersarneqassaaq:

Isumasiuutit

§ 1. Init ataatsimoorfusartut nalunaarummi matumani imatut paasineqarput: Isiginnaartitsisarfiit, filmertarfiit, neriniartarfiit, qitittarfiit (diskoteker), inersuit nalliuttorsiortarfiit, init ataatsimiittarfiit, init nipilersortarfiit, init saqqummersitsisarfiit, timersortarfiit, init atuartsiffusartut aamma illut allat aamma init, tamakku assigisaannut atorneqartartup attuumassuteqartunik torsuusaqartut aamma qimaaffissaqartut, torsuusat, igaffeqartut, toqqorsiveqartut aamma inimut ataatsimoorfusartumut pineqartumut toqqaannartumik attuumassuteqartunik allanik ineqartut.

Pisussaaffiit

§ 2. Kinaluunniit piginnittoq, attartortoq, ingerlatsisutut attartortoq imaluunniit allatut inimik ataatsimoorfusartumik ingerlatsisoq inunnut 150-it sinnerlugit naatsorsuussaasumik qulakkiissavaa, atortut innaallagiatortut ikkussorneqarsimasut tamakkununga ilanngullugit ajornartoornermi aamma uiertogarnerani qaammaqqutitut atorneqartut, kiisalu atortut innaallagiatortut attuumassuteqartut inini katersuuttarfusuniittut kiisalu isertarfi aamma qimaanermi aqqutissat tassunga atasut, qaammatit 24-nngorneri tamaasa suliffeqarfimmit elinstallatøritut akuersisummik pigisaqartumit misissorneqartarnissaat isumagisassavaa.

Imm. 2. Misissuinermi imm. 1 naapertorlugu ingerlanneqartumi ikkussukkani imaluunniit atortuni innaallagiatortuni attuumassuteqartuni ajoquteqartoqartoq, taava inuup inimik ataatsimoorfusartumik ingerlatsisup qulakkiissavaa ajoquteqartut iluarsinneqarnissaat.

§ 3. Pisussaataaffimmi § 2-imiittumi aammattaaq ilaapput init ataatsimoortarfiit ataasiakkaarlutik inunnut 150-init ikinnerusunut naatsorsuussaasut, tassa init ataatsimoortarfiit inunnut katillugit 150-it

sinnerlugit atorineqartarpata, kiisalu init ataatsimoortarfiit isertarfii aamma qimaanermi aqutissat ataatsimoorpata.

Imm. 2. Innaallagissiornermut Oqartussat inuup navialisinnaassusia imaluunniit ikkussukkaani allanngortitsisarnerit suliarineqartartut akulikissusiat tunngavigalugit nalilersuinermit init ataatsimoortarfusut ataasiakkaat imaluunniit init ataatsimoorfusartut aalajangersimasut imm. 1-imi pisussaaffimmut ilaatinngissinnaavai.

Uppernarsaasersuineq il.il.

§ 4. Ikkussorneqarsimasunik aamma atortunik innaallagiatortunik attuumassuteqartunik misissuisimanerup ingerlanneqarsimeranut aamma pissutsit ajunngitsutut isigineqarsimanerannut imaluunniit ajoquteqarsimajunnartut iluarsineqarsimanerannut uppernarsaasersuutitut atugassatut, suliffeqarfup elinstallatørip akuersissummik pigisaqartup Innaallagissiornermut Oqartussat immersugassaataat (assigisaaluunniit) immersussavaa atsiorlugulu. Uppernarsaat inimi ataatsimoorfusartumi nivinngassavaa atuisunut isigalugu takusassanngorlugu.

Imm. 2. Uppernarsaat aamma immersugassaq Innaallagissiornermut Oqartussanut piumaneqarsinnaavoq imaluunniit uani www.elmyndighed.gl. Uppernarsaatip assiliner/assinga Innaallagissiornermut Oqartussanut nassiunneqassaaq.

Aningaasartuutit

§ 5. Mississuinermit nalunaarut manna naapertorlugu ingerlanneqartumut atatillugu aningaasartuutit misissuinerup ingerlanneqarsimeranut pisussaataasup akilissavai.

Pineqaatissiissutit

§ 6. Akiligasiinermik pineqaatissiisoqarsinnaavoq imatut iliortoq

- 1) § 2, imm. 1, unioqqutillugu misissuititsinissamik pinngitsoortitsisoq,
- 2) § 2, imm. 2, unioqqutillugu qulakkeerinninnermik pinngitsoortitsisoq ikkussorneqarsimasuni imaluunniit atortunik innaallagiatortuni attuumassuteqartuni ajoqutinik iluarsaassititsinngitsoq, imaluunniit
- 3) § 4, imm. 1, unioqqutillugu uppernarsaammik nivinngaanngitsoortoq.

Imm. 2. Ingerlatseqatigiiffiit il.il. (inatsilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput

Imm. 3. Akiligassanngortinneqartut Nunatta Karsianut nakkartinneqassapput.

Atuutilersitsineq

§ 7. Nalunaarut atuutilerpoq, ulloq 24. september 2021.

Innaallagissiornermut Oqartussat, ulloq 23. september 2021

Michael Petersen
Innaallagissiornermut Oqartussani pisortaq

/Jane Lynge Hansen (sign.)

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut